

ERINDISBRÉF

Umhverfis- og skipulagsnefnd

Stjórnskipuleg staða

Nefndin heyrir beint undir Bæjarstjórn Hornafjarðar. Starfsmaður ráðsins er yfirmaður umhverfis- og skipulagsmála.

Skipan, seturéttur á fundum og áheyrnaraðild

Í nefndinni eiga sæti fimm fulltrúar kosnir af bæjarstjórn að afloknum sveitarstjórnarkosningum skv. ákvæðum *sveitarstjórnarlaga*. Bæjarstjórn kýs ráðinu formann og varaformann og hverjum aðalmanni er jafnframt kosinn varamaður. Hafi tveir eða fleiri flokkar eða framboðslistar haft samstarf um kosningu framkvæmdanefndar, skal sá sem tilnefndi viðkomandi ráðsmann einnig tilnefna varamann hans, nema öðruvísi hafi verið ákveðið í yfirlýsingu skv. 2. mgr. 24. gr. sveitarstjórnarlaga.

Kjörtímabil nefndarinnar er hið sama og bæjarstjórnar. Auk kjörinna fulltrúa eiga bæjarstjóri, yfirmaður umhverfis- og skipulagsmála, framkvæmdastjóri rekstrar-, fjármála og framkvæmda rétt til fundarsetu með málfrelsi og tillögurétti. Þá er heimilt að kalla til á fundi nefndarinnar sérhvern þann er tengist málum sem fjallað er um hverju sinni. Starfsmönnum stofnana bæjarins er skylt að sitja fundi nefndarinnar sé þess óskað.

Hlutverk og verksvið

Meginhlutverk nefndarinnar er að móta stefnu varðandi umhverfis-, skipulags- og byggingarmál. Nefndin fer jafnframt með lögbundið hlutverk skipulags-, umhverfis- og byggingarnefndar. Meðal verkefna nefndarinnar er:

- ◆ að vera bæjarstjórn til ráðgjafar og veita umsögn um erindi á verksviði nefndarinnar,
- ◆ að fylgjast með framkvæmd laga og reglugerða er snerta starfssvið nefndarinnar,
- ◆ að hafa forgöngu um gerð skipulagstillagna og fjalla um þær tillögur sem nefndinni berast,
- ◆ að fjalla um umsóknir um leyfi til bygginga og annarra verklegra framkvæmda,
- ◆ að hafa umsjón með því að byggt sé í samræmi við skipulag og að skipulagsákvæði séu haldin,
- ◆ að leggja fram tillögur um nöfn opinna svæða og heiti nýrra gatna, torga og bæjarhluta,
- ◆ að vera bæjarstjórn til ráðgjafar og veita umsögn um erindi sem tengjast samgöngumálum,
- ◆ að sinna umferðafræðslu og vinna að bættu skipulagi umferðamála,
- ◆ að fjalla um og kynna stefnumótun opinberra aðila í samgöngumálum, svo sem í vegaáætlun og flugmálaáætlun,
- ◆ að fylgjast með framkvæmd náttúruverndarlaga og annarra laga og reglugerða er snerta starfsviðs nefndarinnar,
- ◆ að fjalla um skipulag opinna svæða og lóða sveitarfélagsins,
- ◆ að stuðla að góðri umgengni í sveitarfélaginu
- ◆ að annast störf náttúruverndarnefndar og stuðla að náttúruvernd og fræðslu um náttúruferir,
- ◆ að fara með hlutverk stjórnar fólkvangs í Óslandi,

- ◆ að fjalla um önnur þau mál sem bæjarstjórn felur henni.

Starfshættir

Um starfshætti undirnefnda Bæjarstjórnar Hornafjarðar er fjallað í IV. kafla í *Samþykkt um stjórn og fundarsköp Sveitarfélagsins Hornafjarðar* og skal ákvæðum kaflans fylgt eftir því sem við á.

Nefndin kemur saman á fastákveðnum fundartíma einu sinni í mánuði. Skal gerð samþykkt um þennan fundartíma á fyrsta fundi að fenginni tillögu bæjarstjóra. Boðað skal til aukafunda að ákvörðun formanns eða ef a.m.k. tveir nefndarmanna óska þess. Heimilt er að fella niður fundi að sumarlagi og á öðrum tímum að mati formanns. Nefndin getur auglýst einstaka fundi sína opna, en annars verður stjórnin að samþykkja viðveru hvers þess sem ekki á seturétt á fundinum.

Þá getur nefndin staðið fyrir kynningarfundum vegna starfa sinna eða þeirra verkefna sem til umfjöllunar eru, og skulu slíkir fundir öllum opnir.

Nefndarformaður stýrir fundum nefndarinnar.

Starfsmaður nefndarinnar sér um að taka á móti erindum og málum sem leggja á fyrir nefndina. Hann útbýr í samráði við formann skriflegt eða rafrænt fundarboð þar sem tilgreindur er fundarstaður og -tími og dagskrá í tölusetnum liðum. Fundarboð skal sent öllum aðalmönnum (varamönnum í forföllum aðalmanna) og öðrum sem seturétt eiga á fundum nefndarinnar. Boðun funda skal fara fram með tryggilegum hætti svo öruggt sé að fundarboð hafi borist öllum í síðasta lagi sólarhring fyrir fund. Fundargerð seinasta fundar skal send með fundarboði.

Starfsmaður færir fundargerð hvers fundar og er ábyrgur fyrir að hún sé lesin upp í lok fundar og staðfest af viðstöddum fundarmönnum. Fundargerð skal greina númer fundar, skv. talningu ákveðinni af bæjarstjórn, hvar og hvenær fundur er haldinn og hverjir sitji hann. Skrá skal mál sem tekin eru fyrir og þess sérstaklega getið ef mál er tekið fyrir utan dagskrár fundarins. Lýsa skal erindum með meginefni þeirra, aðilum og dagsetningum bréfa.

Nefndin afgreiðir mál með samþykktum, ályktunum og ákvörðunum. Sé mál ekki afgreitt samhljóða, skal greina í fundargerð hvernig atkvæði hafa skipst.

Fundargerð má hvort heldur sem er færa í gerðarbók eða beint í tölvu, en sérstaklega skal gætt ákvæða í *Samþykkt um stjórn og fundarsköp Sveitarfélagsins Hornafjarðar*. Í lok fundar skal fundarritari lesa fundargerðina upp og allir viðstaddir undirrita hana, í gerðarbók og á útprentun tölvufærðrar fundargerðar ef því er til að skipta. Starfsmaður kemur undirritaðri fundargerð til framkvæmdastjóra stjórnsýslusviðs sem sér um að fundargerð sé lögð fram með dagskrá næsta fundar í Bæjarráði Hornafjarðar.

Formaður sér um boðun funda eða felur það starfsmanni nefndarinnar.

Ályktanir til bæjarstjórnar og bæjarráðs skulu ætíð sendar bæjarstjóra í sérstöku erindi.

Nefndarmenn skulu fá hæfilega þóknun úr bæjarsjóði fyrir störf sín samkvæmt nánari ákvörðun bæjarstjórnar.

Eftirfylgni

Nefndin og yfirmaður umhverfis- og skipulagsmála, hafa með höndum framkvæmd þeirrar stefnu sem mótuð hefur verið á hverjum tíma varðandi málefni umhverfis-, skipulags- byggingarmála. Formaður og aðrir nefndarmenn skulu snúa sér til bæjarstjóra til að fylgja eftir þeim ákvörðunum og samþykktum sem ekki eru alfarið á verksviði nefndarinnar að framfylgja.

Réttindi og skyldur nefndarmanna

Um réttindi og skyldur nefndarmanna gilda ákvæði *Sveitarstjórnarlaga* og *Samþykktar um stjórn og fundarsköp Sveitarfélagsins Hornafjarðar* eftir atvikum.

Nefndarmanni er bæði rétt og skylt að sækja fundi nema lögmæt forföll hamli. Nú forfallast aðalmaður í nefndinni um stundarsakir og skal hann þá boða tilnefndan varamann sinn og láta formann eða starfsmann vita um forföllin með góðum fyrirvara. Flytjist aðalmaður burt úr sveitarfélaginu, falli hann frá eða forfallist varanlega á annan hátt, tekur tilnefndur varamaður sæti hans þar til aðalmaður er kosinn að nýju og eftir atvikum annar varamaður.

Hver nefndarmaður á rétt á að koma máli á dagskrá fundar, enda skili hann efni þess til starfsmanns a.m.k. fimm sólarhringum fyrir fund. Nefndarmenn skulu hafa hag bæjarins að leiðarljósi við störf sín en eru ekki bundnir af öðru en sannfæringu sinni og lögum í atkvæðagreiðslu um málefni á vettvangi nefndarinnar. Þá skulu þeir virða í hvívetna *Samþykkt um stjórn og fundarsköp Sveitarfélagsins Hornafjarðar*.

Nefndarmenn, starfsmaður og aðrir sem fundi nefndarinnar sitja eru bundnir þagnarskyldu um það sem þeir fá vitneskju um á fundum eða í öðru starfi sínu fyrir nefndirnar og ætla má að leynt eigi að fara samkvæmt eðli máls, lögum eða samþykkt 2/3 nefndarmanna, hvort sem þau varða einka- eða almannahagsmuni.

Nefndarmaður skal víkja af fundi við umræður og atkvæðagreiðslu mála sem varða hann sjálfan, skyldmenni hans eða nánustu venslamenn svo mjög að ætla má að það móti viljaafstöðu hans að einhverju leyti. Honum er þó heimilt að gera stuttlega grein fyrir afstöðu sinni áður en hann víkur af fundi. Nefndarmanni er skylt að vekja athygli á því ef hæfi hans til meðferðar máls orkar tvímælis.

Lög og reglugerðir

Í störfum sínum skal nefndin taka mið af þeim lögum og reglugerðum sem snerta starfssvið hennar, sérstaklega þó skipulags- og byggingarlögum nr. 73/1997 m.s.b., byggingarreglugerð nr. 400/1998, skipulagsreglugerð nr. 441/1998 og umferðarlögum nr. 50/1987 m.s.b, vegalögum nr. 80/2007, reglugerð um ríkisframlag til þjóðvega í kaupstöðum og kauptúnum nr. 257/1964 og reglugerð nr. 325/1995 um girðingar með vegum, lögum um náttúruvernd nr. 44/1999 og lögum nr. 60/1992 m.s.b. um Náttúrufræðistofnun Íslands og náttúrustofur. Einnig Auglýsingu nr. 427/1982 um fólkvang í Óslandi.

Þá skal nefndin fylgja *Samþykkt um stjórn og fundarsköp Sveitarfélagsins Hornafjarðar* eins og hún er hverju sinni.